

Deporte Local

El a logra e di 5 lugar

Elliott Loonstra PLY a participa na e di dos evento di e 'World Para Taekwondo Grand Prix Series'



ORANJESTAD (AAN): Elliott Loonstra PLY y su coach Luciano Mazzeo a participa na e di dos evento di e 'World Para Taekwondo Grand Prix Series' cu a tuma lugar na Paris Francia dia 5 di september 2022. E evento a wordo teni na 'Palais des Sports Marcel Cerdan' y a participa un total di 28 pais di cuater continente.

Na e evento aki solamente e top 12 atletanan na mundo den cada categoria ta permiti pa participa na e peleanan. Loonstra PLY cu actualmente ta number 10 na mundo a participa contra di Spajic di Serbia cu ta number 9 na mundo.

Esaki tabata un pelea excitante pasobra no solamente tabata lucha pa e semifinal pero tambe pa e ranking mundial. Elliott Loonstra PLY a haci su best pero e pelea a termina na favor di e Serbia.


Elliott Loonstra

PLY a haci un bon trabou durante di e evento aki na Paris finalizando na di 5 lugar, cual ta un mehoracion di e prome evento di e serienan cu a tuma lugar na Bulgaria, caminda cu el a termina na di 9 lugar.

Elliott Loonstra PLY ta actualmente na Brazil pa otro competencia, preparando pa e di tres evento di e 'World Para Taekwondo Grand Prix Series' cu lo tuma lugar na Manchester, Inglatera na october benidero.

Loonstra PLY a keda na di cinco lugar e ultimo biaha cu e tabata na Manchester y hunto cu su team ta buscando e podium den e competencia benidero.

Loonstra PLY y su team kier duna danki na tur esnan cu e yudansa cu nan a duna su persona durante e ultimo lunanan pa asina e por yega mas cerca di su metanan.



Atco Indians a bay ariba 2-1 den serie di playoff contra NBO Heat

ORANJESTAD(AAN): Recientemente ATCO Indians a gana NBO Heat 10-0, pa bay ariba 2-1 den e serie di playoff di Baseball Double-A.

ATCO a clasifica pa e playoff na prome lugar, mientras cu NBO Heat a caba na di 4 lugar. Nan ta bringando awor pa un lugar den final.

Ganador di 3 wega den semi final lo pasa pa e final contra sea Red Machine of Sluggers.

En total ATCO a bati 7 hit y a comete 2 error, mien-

tras cu Heat a tambe a bati 7 hit y tambe a comete 2 error.

Pitcher ganador tabata Alfred v/d Linden, mientras cu pitcher perdedor a resulta di ta Vijandrick Jacobs.

Mihor bateadornan pa ATCO tabata Edmar Tromp 2-2, Jourick Blanco 3-2, Mitchel Martes 3-2 y Jerieel Rafael 3-1.

Pa Heat e mihor bateadornan tabata Marlon James 4-2, Clayton Boef 2-1, Clayder Polanco 3-1 y Johnny Winterdaal 3-1.

